

SARS YI TSUNDZUXA VAN'WASWIMAWUSA VA VAT KU RHUMELA MITLHERISO LEYI KAYIVELEKE KUMBE VA TIRHANA NA GOZA RA XINAWU

Pretoria, Ravuntlhanu, 22 Khotavuxika 2018 – Vukorhokeri bya Xibalo bya Afrika-Dzonga (SARS) byi tsundzuxa van'waswimawusa va Xibalo xa Mixavo ya Swimakiwa (VAT) ku rhumela mitlheriso ya vona leyi kayiveleke ku papalata mixupulo ya mafambiselo na/kumbe vuchuchisi bya vugevenga.

Hi ku ya hi Nawu wa Vufambisi bya Xibalo Nomboro 28 wa 2011 (TAA), naswona ngopfungopfu Xiyenge xa 234 (d), i nandzu wa vugevenga loko u nga rhumeli ntlheriso wa xibalo eka muxaka wun'wana na wun'wana wa xibalo lowu muhakelaxibalo a nga titsarisela wona. Mixaka ya xibalo hi leyi:

- Xibalo xa Mali leyi Nghenaka xa Munhu hi Yexe (PIT)
- Xibalo xa Mali leyi Nghenaka xa Bindzu (CIT)
- Hakelo Hi Ku Ya Hi Muholo (PAYE)
- Xibalo xa Mixavo ya Swimakiwa (VAT)

Ku tsandzeka ku rhumela mitlheriso enkarhini lowu faneleke swi nga fikelerisa eka laha mixupulo ya mafambiselo yi nga sindzisiwaka eka ntlheriso wun'wana na wun'wana lowu kayiveleke. Swi nga fikelerisa eka vuchuchisi bya vugevenga leswi nga fikelerisaka eka ndziho kumbe ku pfaleriwa ekhotsweni.

Van'waswimawusa hinkwavo va VAT lava nga na mitlheriso leyi kayiveleke, ku katsa na lava tsandzekeke ku rhumela ntlheriso lowu faneleke ku rhumeriwa ro sungula, kumbe va nga rhumelangi ntlheriso wa VAT201 enkarhini wa VAT wa Dzivamisoko/Mudyaxihi, va ta amukela switsundzuxo swa SMS kumbe Imeyili swo suka eka SARS ku sukela namuntlha leswaku va rhumela mitlheriso ya vona leyi kayiveleke.

Ku papalata mixupulo yin'wana na yin'wana, ntswalo, vuchuchisi ku katsa na khotso, vahakelaxibalo va hlohloteriwa ku lulamisa xiyimo xa vona xa nandzeleriso hi ku rhumela mitlheriso yin'wana na yin'wana hi xihatla erhavini ra le kusuhi na vona ra SARS kumbe hi ku tirhisa eFiling ya SARS eka www.sarsefiling.co.za.

Swi na nkoka ku tekela enhlokweni leswaku loko ntlheriso wun'wana na wun'wana wo fikelela eka xikweleti xa xibalo, xikweleti xi fanele xi hakeriwa ku nga fika siku leri faneleke ro pfala ku papalata ntswalo wun'wana na wun'wana wa nhlwelo wa hakelo no goza ra nawu. SARS yi ta tiyisisa leswaku mivuyiselo ya timali ya hakeriwa, handlekaloko ku ri na xivangelo xa xinawu xo khoma vuyiselo wa mali.

Van'waswimawusa hinkwavo va tsundzuxiwa ku ku rhumela mitiviso leyi lulameke tanihileswi SARS yi nga ha endlaka oditi.

Ku kuma tihlamuselo ku ya emahlweni, vahakelaxibalo va nga bela Contact Centre ya SARS riqingho eka 0800 00 7277.